

Despues di basta dialogo den Corte

FTA a bay di acuerdo pa Global paga e trahadornan 50% di nan salario

ORANJESTAD(AAN) -- Sindicato F.T.A. no kier a tende mes di e oferta di Global di paga 50% di salario di e trahadornan di Masquerade Casino. Door di intervension di Juez mr. Behrens kende a bisa cu mihor algo cu nada, F.T.A. a dicidi di bay di acuerdo en espera di e decision di Juez otro siman diaranzon.

Ayera mainta un cantidad di e trahadornan di Masquerade Casino a presenta den Corte pa scucha e caso cu nan sindicato a entama contra Global. Door cu e sala grandi tabata ocupa, Juez mr. Behrens a trata e caso den e sala chikito abao. Esey a trece cuncu no tur e trahadornan por a drenta den e sala y hopi a keda warda pafor.

Abogado mr. Thijsen di F.T.A. a bisa Juez cu ayera mainta nan a bay scucha e oferta di Global pero no a bay di acuerdo. Ta asina cu ayera Global no a paga e trahadornan. El a ofrece di paga 50% di nan salario pero e trahadornan ta para riba cu nan kier haya 100% di nan salario mescos cu e otro empleadonan di Radisson ta hayando.

Thijsen a bisa Juez cu Global no kier firma un protocol cu F.T.A. caminda ta garantiza cu e trahadornan lo haya durante 9 luna largo 100% di nan salario. Global a laga sa cu promer e paga e trahadornan mester yega na un acuerdo cu Dutchco. El a señala cu ta for di Maart 1997 Global tabata sa cu lo bay cera e hotel y casino y awor ta bisa cu no tin placa pa paga. Thijsen ta haya cu Global ta hunga un wega caminda nan ta pone presion riba Dutchco door di keda sin paga e trahadornan. Thijsen kier pa e trahadornan haya 100% di nan salario caminda e trahadornan lo haci cualkier trabao cu tin di haber cu e hotel. El a menciona como ehempel Americana Hotel y Wyndham.

E abogado a enfatisa cu e trahadornan no por ta victima di un problema entre Global y Dutchco. Thijsen a bisa Juez cu e tin entendi cu Global y Dutchco ta dispuesto pa yega na un acuerdo.

El a pidi Juez pa ordena Global pa paga e trahadornan 100% di nan salario y cu nan

ta dispuesto pa traha pa un bon causa.

Abogado mr. Brown di Global a bisa Juez cu Global no por paga e trahadornan pasobra simplemente no tin placa. Dia 31 di Maart 1998 Dutchco a cera e hotel y a pone Global riba caya. Ta pesey Global a cuminsa un caso contra Dutchco cual ta tuma lugar awe caminda nan ta demanda un daño pero juicio di 2.2 milyon dollar.

E abogado a bisa Juez cu e caso di awe di Global contra Dutchco ta crucial pa determina e futuro pago di salario di e trahadornan di Masquerade Casino.

Bao di circunstancia actual Global no tin placa pa paga e trahadornan nan salario completo. El a muestra cu Global ta dispuesto pa paga 50% y cu e trahadornan por haci otro trabao te ora e casino habri atrobe. F.T.A. no kier tende di 50% sino 100%. Segun mr. Brown e mocion di Parlamento ta muestra cu ta Dutchco mester paga tur e tra-

hadornan y pesey ta haya cu F.T.A. mester bay cerca Dutchco.

E abogado di Global na Merca y e presidente di Global tabata presente den Corte. E abogado a bisa Juez cu nan ta dispuesto di paga 50% na e trahadornan. Juez a bisa mr. Thijsen cu lo ta mihor tuma e 50% cu no haya nada. El a sigui bisa cu e caso di awe lo ta crucial y e lo prefera pa mira con e caso ey ta bay promer cu e tuma un decision den e caso aki.

Mr. Thijsen a bisa Juez cu Global tin placa pa paga pero no kier haci esaki. El a bisa Juez cu e 50% di salario aki no ta yega na e trahadornan por cubri nan debenan y cumpra cuminda. Juez a bisa cu e ta compronde esey pero awor tin e oferta cu siquiera nan por haya 50% di nan salario. E ta haya cu mihor e trahadornan haya algo y despues di e caso di awe e lo dicta sentencia.

Despues di a dialoga cu tanto Geerman y Pontilius di F.T.A., mr. Thijsen a bay di



acuerdo cu e proposicion pero cu e entendimento cu Juez lo mester dicidi con Global ta paga e otro 50%. Global a bisa cu lo por paga e trahadornan diaranzon. Juez a bisa cu e lo bay pone su mes na altura di e caso di awe pa asina e sa e situacion financiero di e dos companianan y otro siman 29

di April e lo dicta sentencia. E solucion temporario aki no a cay mucho na agrado di e trahadornan. Por a scucha e trahadornan expresa cu mihor keda sin haya salario cu e 50%. Tin otro a expresa cu mihor Global declara bancarota y baha na awa.

HERO TRUSPOSTIA!!

